

Daegco caeuq Daegsi dwg lauxbiuj, geij bi mbouj raennaj lo. Miz ngoenz he, song boux de sawqmw haw youq gwnz haw doxraen, couh bae aen diemqlaeuj ndeu doxgangj hwnjdaeuj. Daegco naeuz: “Gobiuj aeu gouq gou a, seizneix gou boihseiz lai bw.” Daegsi cam: “Vihmaz? Mwngez fatseng gijmaz saehcingz?”

Daegco dap: “Mwngez dingq gou gangj gonq. Laj byavaiz miz gaiq dieg bingz he, henz haenx miz aen mboq ndeu, seizzah gig ndei dajcaemx. Youh miz geij go faex hung, gwnz haenx gang geij gaiq baengzyouz, baihlaj miz daiz dwk mazcoz roxnaeuz dwkbej……Liz aen mboq 300 mij couhdwg Mbanjlaj.


Canghgyah youq gizhaenx guhdoj haemq nanz lo, gingjaz bae gaemh doj geij mbat cungj doekhoengq, cijndei coemh cuengx baengzyouz bae. Hoeng, doeklaeng gyoengqde ciuqyiengh dap cuengx hwnjdaeuj laebdaeb guhdoj. Gyoengq boux guhdoj ciengzseiz doj daengz mbouj miz saek faen ngaenz bae, mbouj miz ngaenz youh siengj laebdaeb guhdoj, cijmiz bae guhcaeg lo. Ndigah, huq Mbanjlaj ciengz deng vunz caeg.

Miz di hai ciij daeuj gizhaenx guhdoj, miz di gwih mohdozceh daeuj. Couhlienx mizmbangj vunz Mbanjlaj gwed fag gvak he daj ndaw naz dauq hix cigsoh daengz gizhaenx bae doj yaep he, nguh hong youh bae ngaenz, ndigah miz coenz vahsug gangj: ‘10 boux vunz guhdoj, 9 boux vunz hojndoj’.

Bouxguhdoj baez daengz, canghgyah gizhaenx couh hawj boux vunz ndeu bau ien Hungzdazsanh he. Daengz banhaemh, lij cingj boux vunz saw ngaenz lai gwn caeuz, caiq hawj di ngaenz bae dap ci ma ranz dem. Canghgyah lij baij vunz souj youq bakroen, ngoenz ndeu hawj 100 maenz ngaenz. Baez raen ci gingjaz roxnaeuz gyoengq vunzseng gvaqdaeuj, bouxsouj couh daj soujgih lwnh hawj canghgyah dingq. Ndigah, gingjaz bae cungj gaemh mbouj ndaej saek boux vunz guhdoj. Danghnaeuz deng gingjaz gaemh bae, gyaeng geijlai ngoenz, boux vunz ndeu ngoenz he ndaej 50 maenz ngaenz, cuengq dauqdaeuj couh ndaej bae caeuq canghgyah aeu ngaenz. Ndigah, miz haujlai vunz bae gizhaenx guhdoj.

Gou geij ndwen neix hix bae gizhaenx guhdoj, gaenq deng canghgyah yaeuh bae geij fanh maenz ngaenz lo. Saek ngoenz, canghgyah dawz ngaenz bae yinzhangz cunz, raeuz cangndang hawj de nyinh mbouj ok dwg byawz couh bae ciengj ngaenz dauqdaeuj?”

Daegsi naeuz: “Gou mbouj guh. Deng gaemh



engq boihseiz bw. Mbounnex yienghneix, haetcog dwg cingmingz gou couh mbouj bae baiq goeng lo, hawj go gou bae, gou caeuq mwngez bae yawjyawj gyoengqde baenzlawz yaeuh ngaenz vunz bae.” Daegco gig angq.

Ngoenzlaeng, Daegco heuh geijcib boux baengzyoux, caeuq Daegsi itheij bae guhdoj. Canghgyah mbouj roxnaj Daegsi, raen dwg Daegco daiqdaeuj, couh vix Daegsi cam Daegco: “De dwg byawz?” Daegco naeuz: “De dwg lauxbiuj gou, heuh guh Daegsi, ok rog bae dajgoeng dauqma ranz noix, mwngez mbouj raen de gvaq.” Geijcib boux vunz riengz daeuj guhdoj hix cingqmingz. Canghgyah yawj naj Daegco caeuq Daegsi miz di doxdoengz, de cij hawj Daegsi haeujbae guhdoj. Daegsi, Daegco caeuq geijcib boux baengzyoux de youq giz guhdoj doj ndaej da hoengz caez. Songde geij mbat hingz ndaej 2 fanh maenz ngaenz gonq, doeklaeng youh saw okbae caez.

Banhaet, doekfwn lo, miz geij boux saimbwk gwed fag gvak dawz geiswx daeuj daengz laj baengzyouz ndoj fwn. Boux gwed fag gvak haenx baez raen Daegsi couh ndaq: “Nuengx ha, ngoenzneix dwg cingmingz, mwngez mbouj bae baiq goeng cix daeuj gizneix guhdoj, mwngez caen dwg ra dai a.” Ndawsim Daegsi gig lau, mbouj gamj gangj vah. Daegco ndoj daengz giz vunz lai bae, mbouj hawj boux gwed fag gvak haenx yawjraen naj de. Canghgyah raen Daegco bae ndoj, youh raen yiengh boux gwed fag gvak haenx caeuq Daegsi engq doxdoengz, rox de itdingh dwg go Daegsi, couh siengj rag de daeuj guhdoj. Canghgyah doq dawz bau ien he bae hawj boux gwed fag gvak haenx doq naeuz: “Go Daegsi, haeujdaeuj naengh yaep ndeu gonq, baiq goeng dauq itdingh fatcaiz!” Go Daegsi naeuz: “Mbouj doj, caj fwn doek noix di dou lij aeu hwnj bya wnq bae baiq goeng.” Canghgyah nyengh

rag go Daegsi haeujbae, hawj de naengh henz daizdoj. Daegsi couh vix boux vunz youq henz daiz lwnh hawj go de rox dwg byawz, guhdoj haenq mbouj haenq. Caj Daegsi gangj sat, go de sikhaek ndwn hwnjdaeuj dawz fag cungqdinj he okdaeuj, naeuz: “Gaej doengh!”

Canghgyah caeuq gyoengq guhdoj baez dingq doeksaet caez, naj bienq heu liux. Miz bouxguhdoj he mbouj lau dai, doq yamq din yaek buet. Go Daegsi coh gwnz mbwn “byaz” dwk nyingz mbat cungq he, naeuz: “Ndw ndei daeuj, mbouj cinj doengh! Byawz caiq doengh saek di gou couh nyingz byawz!” Gyoengq bouxguhdoj rox go Daegsi dwg gingjaz, youh raen cij miz de boux vunz he, bouxboux cungj siengj baengh vunz lai couh swnhgei buetdeuz bae, seizhaenx ciengz guhdoj youh luenh hwnjdaeuj lo. Geij boux daeuj ndoj fwn haenx doengzseiz dawz cungqdinj okdaeuj coh gwnz faex nyingz geij mbat, boux he dawz gok ndeu humx ciengz guhdoj hwnjdaeuj. Miz haujlai bouxguhdoj lau ndaej nyoh yit dangzvaq, yousim swheij deng cungq nyingz, cijndei bouxboux caj gingjaz daeuj coq gazfwngz. Yaep he, miz geij gyaq ci gingjaz hai daeuj, yinh gyoengq bouxguhdoj baema ginggiz lo.

Gyoengq bouxguhdoj mbatneix deng gaemh, miz di deng lauzgaij, miz di ngaiz fadcienz caemhcaiq gyaeng cibgeij ngoenz cij ndaej cuengq dauqdaeuj. Ndawde, Daegco ganciep bang gingjaz gaemh bouxguhdoj, hix suenq dwg laebgoeng, ndigah gyaeng de geij ngoenz, gyauyuz de doeklaeng mbouj cinj caiq guhdoj couh hawj de dauqma ranz lo.

Byawz rox, Daegsi caeuq go de youq diegrog dang gingjaz. Caeux couh gaen aen ciengz guhdoj neix lo. Bae gaemh geij mbat, gyoengqvunz dawz youq bakroen baez raen vunzseng couh daj soujgih bauq, Canghgyah doq anbaiz gyoengq bouxguhdoj buetdeuz. Yienghneix gingjaz bae gaemh hix gaemh mbouj ndaej geijlai vunz. Daengz gyoengq gingjaz baez lizhai, youh guhdoj hwnjdaeuj, mbouj miz geijlai yauoj. Gyoengq gingjaz mbouj rox baenzlawz guh seiz, cij rox lauxbiuj Daegsi geij ndwen neix hix bae gizhaenx guhdoj, ndigah couh siengj ok aen banhfap neix. Daegsi caeuq Daegco youq gwnz haw doxraen, go Daegsi bae baiq cingmingz gvaq gizhaenx cungj dwg gaxgonq giva gvaq. Yienghneix, aen ciengz guhdoj hung neix couh deng gingjaz siubae lo. Gyoengqvunz Mbanjlaj rox le, angq dangqmaz, caiq hix mbouj yungh yousim gij huq deng bouxguhdoj caeg bae lo, doiq gingjaz haenh mbouj dingz bak.

Maezsaenq Aeu Mbouj Ndaej

迷 信 要 不 得

□ Lanz Veisungh / 蓝卫松

Aen mbanj iq neix youq ndaw bya, daengx mbanj miz cib lai ranz. Youq aen sigij gonq 90 nienzdaih, vunz mbanj neix gig maezsaenq.

Miz ngoenz ndeu, ndaw mbanj miz boux coz he hwnj bya bae aeu fwnz, bya sang hoeng loh gaeb, de mbouj siujsim caij deng ndaek rin soeng he, couh daj gwnz bya sang ringx roengzdaeuj, gyaauj daemj daengz ndaek rin hung bae, gaemz hei q cungj mbouj miz lo.

Vunz daengx mbanj doeksaet caez, aenvih youq ndaw mbanj, mbouj daengz 36 bi couh dai mbouj gitleih, gij hoenz boux dai mbouj ndaej haeuj yaemgan, caemhcaiq lij dauqma ndaw mbanj loengh bae loengh dauq. Caezgya doxyaeng couh cingj boux guhmo daeuj nam ging, hai fap le couh ram boux dai haenx daengz lueg bya gya bae moek lo.

Banhaemh, ndaw mbanj gyoengq-vunz dauq daengz ranz, gvendou ndaep daeng hwnj congz, beij gaxgonq

ninz ndaej caeux. Daengx mbanj caemrwgrwg, cij dingqnyi gij sing duznengz swenj.

Sawqmw h, daj giz gya cienz daeuj gij sing lumj boux vunz he daej. Aen sing haenx seiz miz seiz daengx, daj gya daengz yawj, gij singyaem dingq ndaej gig dungxliengz. Gyoengq-vunz dingqnyi doq nyinhnaeuz dwg gij hoenz bouxcoz dai haenx dauqma ndaw mbanj lo, bwn ndang daengj caez, bouxboux saenzgywggywg, ganj-gip ndoj daengz laj congz bae, saek di hei q hix mbouj gamj hawj okdaeuj. Seizneix, ndaw mbanj geij duz ma hix swenj hwnjdaeuj.

Ngoenz daihngeih mbwn ngamq rongh, gyoengqvunz couh saemxsaemx saxsax dwk hai dou okdaeuj, daj seiqhenz comzgyoeb youq itheij, doxlwnh haemhlwenz dingqnyi gij sing lumj boux vunz he daej. Seizneix, miz boux ndeu buet gvaqdaeuj, swenj naeuz: “Haetneix gou hwnqdaeuj, fatyienh ndaw riengh gou duz cwz meh



Vadauz Lozcwngz hai, dahsau yawj gig maij.

he bae gizlawz mbouj rox, mbouj raen lo. Sou bae henz riengh gou bang gou ra baez ndeu a!” Caezgya caemh bae daengz aen riengh de bae ra, yawjraen aen suj gij dou riengh cwz gaenq deng geuh vaih, youh yawjraen henz riengh cungj dwg gij rizdin vunz. Gyoengq-vunz cungjsuenq rox gij singyaem haemhlwenz dwg maz lo.Yenzlaiz dwg duz cwz meh haenx ninz laep liux, deng vunzseng rag ok riengh, yienghneix duz cwz meh neix couh

swenj hwnjdaeuj, muengh miz vunz dingqnyi daeuj gaemh bouxcaeg neix. Caen dwg swheij hwk swheij, haemh ndeu cungj mbouj ndaej ninz.

Daj seizhaenx hwnj, aen mbanj neix cungj mbouj dingqnyi gij sing lumj boux vunz he daej lo, caiq hix mbouj saenq gaxgonq naeuz dangh-naeuz bouxvunz mbouj daengz 36 bi dai, gij hoenz de couh mbouj ndaej haeuj yaemgan, cungj dwg youq ndaw mbanj guhyak lo.